

D.R. 22/2023

RANG UNDANG-UNDANG

b e r n a m a

Suatu Akta untuk meminda Akta Suruhanjaya Koperasi Malaysia 2007.

[]

DIPERBUAT oleh Parlimen Malaysia seperti yang berikut:

Tajuk ringkas dan permulaan kuat kuasa

1. (1) Akta ini bolehlah dinamakan Akta Suruhanjaya Koperasi Malaysia (Pindaan) 2023.

(2) Akta ini mula berkuat kuasa pada tarikh yang ditetapkan oleh Menteri melalui pemberitahuan dalam *Warta*.

Pindaan seksyen 2

2. Akta Suruhanjaya Koperasi Malaysia 2007 [*Akta 665*], yang disebut “Akta ibu” dalam Akta ini, dipinda dalam seksyen 2—

(a) dengan memasukkan selepas takrif “kemudahan kredit” takrif yang berikut:

‘ “Ketua Pegawai Eksekutif” ertinya Ketua Pegawai Eksekutif Suruhanjaya yang dilantik di bawah seksyen 11A;’;

- (b) dengan memasukkan selepas takrif “pengarah” takrif yang berikut:

‘ “Pengerusi” ertinya Pengerusi Lembaga yang dilantik di bawah perenggan 11(3)(a);’;

- (c) dalam takrif “tarikh ditetapkan”, dengan menggantikan noktah di hujung takrif itu dengan noktah bertindih; dan

- (d) dengan memasukkan selepas takrif “tarikh ditetapkan” takrif yang berikut:

‘ “Timbalan Ketua Pegawai Eksekutif” ertinya Timbalan Ketua Pegawai Eksekutif yang dilantik di bawah seksyen 11A;’.

Pindaan seksyen 6

3. Subseksyen 6(3) Akta ibu dipinda dengan memotong perkataan “Eksekutif”.

Pindaan seksyen 11

4. Seksyen 11 Akta ibu dipinda—

- (a) dengan menggantikan subseksyen (1) dengan subseksyen yang berikut:

“(1) Suruhanjaya hendaklah mempunyai suatu lembaga pengarah yang hendaklah bertanggungjawab bagi penjalanan urusan dan hal ehwal Suruhanjaya dan hendaklah menjalankan segala kuasa dan melakukan segala tindakan yang boleh dijalankan atau dilakukan oleh Suruhanjaya.”;

- (b) dengan memotong subseksyen (2);

(c) dengan menggantikan subseksyen (3) dengan subseksyen yang berikut:

“(3) Lembaga hendaklah terdiri daripada pengarah yang berikut:

- (a) seorang Pengerusi yang dilantik oleh Yang di-Pertuan Agong, atas nasihat Menteri;
- (b) Ketua Setiausaha atau seorang Timbalan Ketua Setiausaha Kementerian yang dipertanggungjawabkan dengan tanggungjawab bagi pembangunan koperasi sebagaimana yang dinamakan oleh Menteri;
- (c) Ketua Setiausaha Perbendaharaan atau seorang Timbalan Ketua Setiausaha Perbendaharaan atau mana-mana wakil Kementerian Kewangan;
- (d) seorang Ketua Setiausaha atau seorang Timbalan Ketua Setiausaha suatu kementerian sebagaimana yang dilantik oleh Menteri;
- (e) Gabenor, atau seorang Timbalan Gabenor atau Penolong Gabenor Bank Negara Malaysia sebagaimana yang dinamakan oleh Gabenor;
- (f) seorang Ketua Pegawai Eksekutif yang dilantik oleh Menteri di bawah seksyen 11A; dan
- (g) enam orang yang dilantik oleh Menteri, sekurang-kurangnya dua daripadanya hendaklah orang yang berkedudukan dan berpengalaman dalam pergerakan koperasi.”;

(d) dengan memotong subseksyen (4), (5) dan (6);

(e) dalam subseksyen (7)—

(i) dengan menggantikan perkataan “Pengerusi Eksekutif dan Timbalan Pengerusi Eksekutif” dengan perkataan “Pengerusi”; dan

(ii) dengan menggantikan perkataan “surat pelantikan mereka masing-masing” dengan perkataan “surat pelantikannya”; dan

(f) dengan memotong subseksyen (8).

Seksyen baharu 11A, 11B, 11C dan 11D

5. Akta ibu dipinda dengan memasukkan selepas seksyen 11 seksyen yang berikut:

“Ketua Pegawai Eksekutif dan Timbalan Ketua Pegawai Eksekutif

11A. (1) Menteri hendaklah melantik seorang Ketua Pegawai Eksekutif dan tidak lebih daripada tiga orang Timbalan Ketua Pegawai Eksekutif bagi membantu Ketua Pegawai Eksekutif, atas apa-apa terma dan syarat sebagaimana yang diperuntukkan dalam surat pelantikan mereka masing-masing.

(2) Ketua Pegawai Eksekutif dan Timbalan Ketua Pegawai Eksekutif hendaklah menumpukan sepenuh masa profesional mereka kepada perkhidmatan Suruhanjaya dan semasa memegang jawatan itu tidak boleh memegang apa-apa jawatan atau pekerjaan lain sama ada dengan saraan atau tidak.

(3) Walau apa pun subseksyen (2) dan mana-mana peruntukan lain dalam Akta ini, Ketua Pegawai Eksekutif atau Timbalan Ketua Pegawai Eksekutif boleh dilantik oleh mana-mana undang-undang bertulis atau perlembagaan atau statut atau dengan kelulusan Menteri untuk menjalankan

apa-apa kuasa, menunaikan apa-apa kewajipan, dan melaksanakan apa-apa fungsi di bawah mana-mana undang-undang bertulis, dan diberi apa-apa gelaran jawatan sebagaimana yang dinyatakan dalam mana-mana undang-undang bertulis itu.

Kuasa dan tugas Ketua Pegawai Eksekutif

11B. (1) Suruhanjaya hendaklah meletak hak pada Ketua Pegawai Eksekutif mana-mana kuasa dan mengenakan kepadanya apa-apa tugas sebagaimana yang ditentukan oleh Lembaga.

(2) Ketua Pegawai Eksekutif hendaklah bertindak di bawah kuasa dan arahan am Lembaga yang hendaklah selaras dengan Akta ini.

(3) Ketua Pegawai Eksekutif tidak boleh memutuskan mengenai perkara dasar dan hala tuju strategik Suruhanjaya tanpa kelulusan Lembaga.

(4) Ketua Pegawai Eksekutif hendaklah—

- (a) bertanggungjawab bagi keseluruhan pentadbiran dan pengurusan fungsi, aktiviti dan hal ehwal harian Suruhanjaya mengikut dasar yang ditetapkan oleh Suruhanjaya;
- (b) menjalankan pengawalseliaan dan kawalan ke atas semua pegawai dan pekerja Suruhanjaya; dan
- (c) melaksanakan apa-apa tugas lain dan menunaikan apa-apa tanggungjawab lain sebagaimana yang ditentukan atau diarahkan oleh Lembaga dari semasa ke semasa.

(5) Ketua Pegawai Eksekutif hendaklah dengan semunasabahnya berhati-hati, mahir, berusaha dan menggunakan pertimbangan yang wajar dalam menjalankan kewajipannya di bawah Akta ini.

(6) Ketua Pegawai Eksekutif disifatkan telah menggunakan pertimbangan wajar yang disebut dalam subseksyen (5) jika dia—

- (a) membuat pertimbangan itu dengan suci hati bagi maksud yang wajar;
- (b) tidak mempunyai kepentingan peribadi yang material dalam hal perkara pertimbangan itu;
- (c) telah dimaklumkan tentang hal perkara pertimbangan itu pada takat yang dipercayainya secara munasabah adalah patut mengikut hal keadaan itu; dan
- (d) semunasabahnya mempercayai bahawa pertimbangan itu adalah untuk kepentingan terbaik Kerajaan dan Suruhanjaya.

(7) Ketua Pegawai Eksekutif hendaklah melaksanakan apa-apa tugas lain yang boleh diarahkan oleh Lembaga dari semasa ke semasa.

Penjalanan sementara fungsi Ketua Pegawai Eksekutif

11c. (1) Menteri boleh melantik secara sementara mana-mana Timbalan Ketua Pegawai Eksekutif untuk bertindak sebagai Ketua Pegawai Eksekutif bagi tempoh apabila—

- (a) jawatan Ketua Pegawai Eksekutif kosong;
- (b) Ketua Pegawai Eksekutif tidak hadir bertugas atau tidak ada di Malaysia; atau
- (c) Ketua Pegawai Eksekutif, atas apa-apa sebab lain, tidak dapat melaksanakan fungsinya.

(2) Sekiranya jawatan Ketua Pegawai Eksekutif kosong selama lebih enam bulan, Menteri hendaklah melantik seorang lain untuk menjadi Ketua Pegawai Eksekutif, dan atas pelantikan itu, Ketua Pegawai Eksekutif sebelumnya hendaklah terhenti daripada memegang jawatan itu.

Setiausaha Lembaga

11D. (1) Suruhanjaya hendaklah melantik seorang setiausaha kepada Lembaga daripada kalangan pegawai Suruhanjaya bagi apa-apa tempoh dan atas apa-apa terma dan syarat sebagaimana yang dinyatakan dalam surat pelantikannya.

(2) Setiausaha hendaklah bertanggungjawab bagi—

(a) penjalanan, pentadbiran dan pengurusan am fungsi dan aktiviti Suruhanjaya; dan

(b) pelaksanaan keputusan Suruhanjaya.

(3) Setiausaha hendaklah melaksanakan apa-apa kewajipan tambahan sebagaimana yang diarahkan oleh Ketua Pegawai Eksekutif dan Suruhanjaya dari semasa ke semasa.

(4) Dalam menunaikan kewajibannya setiausaha hendaklah bertindak di bawah kuasa dan arahan am Ketua Pegawai Eksekutif dan Suruhanjaya.

(5) Suruhanjaya boleh melantik apa-apa bilangan pegawai dan pekerja Suruhanjaya yang perlu untuk membantu setiausaha dalam menunaikan fungsinya secara berkesan dan cekap dan bagi maksud melaksanakan peruntukan Akta ini.”.

Pindaan seksyen 13

6. Seksyen 13 Akta ibu dipinda—

(a) dengan menggantikan subseksyen (1) dengan subseksyen yang berikut:

“(1) Pengerusi hendaklah dilantik bagi suatu tempoh tidak melebihi lima tahun dan boleh dilantik semula.”; dan

(b) dengan menggantikan perkataan “perenggan 11(3)(c), (d), (e) dan (f)” dengan perkataan “perenggan 11(3)(b), (c), (d) dan (e)”.

Pindaan seksyen 14

7. Seksyen 14 Akta ibu dipinda dengan menggantikan perkataan “perenggan 11(3)(g)” dengan perkataan “perenggan 11(3)(a), (f) dan (g)”.

Pindaan seksyen 15

8. Seksyen 15 Akta ibu dipinda—

(a) dengan menggantikan subseksyen (1) dengan subseksyen yang berikut:

“(1) Seseorang pegawai sesuatu koperasi, sebagaimana yang ditakrifkan di bawah seksyen 2 Akta Koperasi 1993, tidak boleh dilantik atau kekal sebagai seorang pengarah.”; dan

(b) dengan menggantikan subseksyen (2) dengan subseksyen yang berikut:

“(2) Menteri boleh pada bila-bila masa membatalkan pelantikan mana-mana pengarah tanpa memberi apa-apa sebab.”.

Pindaan seksyen 19

9. Seksyen 19 Akta ibu dipinda—

(a) dalam subseksyen (1), dengan menggantikan perkataan “Pengerusi Eksekutif, atau semasa ketiadaannya Timbalan Pengerusi Eksekutif,” dengan perkataan “Pengerusi, atau semasa ketiadaan Pengerusi mana-mana pengarah yang dinamakan oleh Pengerusi untuk bertindak bagi pihaknya,”;

(b) dalam subseksyen (2), dengan menggantikan perkataan “perenggan 11(3)(c), (d), (e) dan (f)” dengan perkataan “perenggan 11(3)(b), (c), (d) dan (e)”;

(c) dalam subseksyen (3), dengan menggantikan perkataan “Pengerusi Eksekutif, atau semasa ketiadaannya Timbalan Pengerusi Eksekutif,” dengan perkataan “Pengerusi, atau semasa ketiadaan Pengerusi mana-mana pengarah yang dinamakan oleh Pengerusi untuk bertindak bagi pihaknya,”;

(d) dengan menggantikan subseksyen (7) dengan subseksyen yang berikut:

“(7) Tiada apa jua dalam seksyen ini boleh menghalang Pengerusi, atau semasa ketiadaan Pengerusi mana-mana pengarah yang dinamakan oleh Pengerusi untuk bertindak bagi pihaknya, daripada membenarkan seorang pengarah untuk menggunakan teknologi komunikasi jarak jauh untuk mengambil bahagian dalam mana-mana mesyuarat Lembaga jika, sebelum mesyuarat itu, pengarah itu, melalui pemberitahuan kepada Pengerusi, atau semasa ketiadaan Pengerusi mana-mana pengarah yang dinamakan oleh Pengerusi untuk bertindak bagi pihaknya, mengikut mana-mana yang berkenaan, telah memohon bagi kebenaran itu.”; dan

(e) dengan memasukkan selepas subseksyen (7) subseksyen yang berikut:

“(8) Pengerusi hendaklah hanya, bagi maksud subseksyen (1), (3) dan (7), menamakan pengarah yang dilantik di bawah perenggan 11(3)(b), (c), (d) atau (e) untuk bertindak bagi pihaknya.

(9) Bagi maksud subseksyen (7), “teknologi komunikasi jarak jauh” ertinya suatu rangkaian video secara langsung, rangkaian televisyen secara langsung atau apa-apa cara komunikasi elektronik yang lain.”.

Pindaan seksyen 24**10. Seksyen 24 Akta ibu dipinda—**

- (a) dengan menggantikan subseksyen (1), dengan subseksyen yang berikut:

“(1) Suruhanjaya boleh, secara bertulis, mewakili mana-mana kuasa atau fungsinya di bawah Akta ini, Akta Koperasi 1993 atau mana-mana undang-undang bertulis lain kecuali kuasa untuk membuat perundangan subsidiari kepada—

(a) Ketua Pegawai Eksekutif; atau

(b) mana-mana jawatankuasa yang ditubuhkan di bawah seksyen 10.”;

- (b) dalam perenggan 2(b), dengan menggantikan perkataan “Pengerusi Eksekutif, Timbalan Pengerusi Eksekutif” dengan perkataan “Ketua Pegawai Eksekutif”; dan

- (c) dalam subseksyen (4), dengan menggantikan perkataan “Pengerusi Eksekutif” di mana-mana jua terdapat dengan perkataan “Ketua Pegawai Eksekutif”.

Pindaan seksyen 45**11. Seksyen 45 Akta ibu dipinda—**

- (a) dalam subseksyen (1), dengan menggantikan perkataan “Suruhanjaya boleh” dengan perkataan “Ketua Pegawai Eksekutif boleh”;

- (b) dalam subseksyen (3), dengan menggantikan perkataan “Pengerusi Eksekutif” di mana-mana jua terdapat dengan perkataan “Ketua Pegawai Eksekutif”; dan

- (c) dalam subseksyen (4), dengan menggantikan perkataan “Pengerusi Eksekutif” di mana-mana jua terdapat dengan perkataan “Ketua Pegawai Eksekutif”.

Pindaan seksyen 46**12. Perenggan 46(5)(b) Akta ibu dipinda dengan menggantikan perkataan “Pengerusi Eksekutif” dengan perkataan “Ketua Pegawai Eksekutif”.**

Pindaan seksyen 56

13. Subseksyen 56(1) Akta ibu dipinda dengan menggantikan perkataan “Pengerusi Eksekutif” dengan perkataan “Ketua Pegawai Eksekutif”.

Pindaan seksyen 60

14. Perenggan 60(2)(b) Akta ibu dipinda dengan menggantikan perkataan “Pengerusi Eksekutif, Timbalan Pengerusi Eksekutif” dengan perkataan “Pengerusi, Ketua Pegawai Eksekutif, Timbalan Ketua Pegawai Eksekutif”.

Pindaan seksyen 62A

15. Seksyen 62A Akta ibu dipinda dengan menggantikan perkataan “Pengerusi Eksekutif” dengan perkataan “Ketua Pegawai Eksekutif”.

Kecualian dan peralihan

16. (1) Tiap-tiap rujukan kepada “Pengerusi Eksekutif Suruhanjaya Koperasi Malaysia” dalam mana-mana undang-undang bertulis lain hendaklah ditafsirkan sebagai rujukan kepada “Ketua Pegawai Eksekutif Suruhanjaya Koperasi Malaysia”.

(2) Orang yang memegang jawatan Pengerusi Eksekutif sebaik sebelum permulaan kuat kuasa Akta ini hendaklah terus memegang jawatan itu dan hendaklah dianggap dilantik sebagai Ketua Pegawai Eksekutif di bawah Akta ibu sebagaimana dipinda oleh Akta ini.

(3) Orang yang memegang jawatan Timbalan Pengerusi Eksekutif sebaik sebelum permulaan kuat kuasa Akta ini hendaklah terus memegang jawatan itu dan hendaklah dianggap dilantik sebagai Timbalan Ketua Pegawai Eksekutif di bawah Akta ibu sebagaimana dipinda oleh Akta ini.

(4) Apa-apa perintah, arahan, garis panduan, surat pekeliling, notis, keputusan kelulusan atau penentuan yang dikeluarkan atau dibuat oleh Pengerusi Eksekutif atau Timbalan Pengerusi Eksekutif sebaik sebelum permulaan kuat kuasa Akta ini hendaklah disifatkan dibuat atau dikeluarkan oleh Ketua Pegawai Eksekutif di bawah Akta ibu sebagaimana dipinda oleh Akta ini dan hendaklah kekal sah.

HURAIAN

Rang Undang-Undang ini bertujuan untuk meminda Akta Suruhanjaya Koperasi Malaysia 2007 [Akta 665] untuk menjelaskan pembahagian kuasa lembaga pengarah Suruhanjaya dan untuk menyusun semula perjawatan dalam Suruhanjaya. Pada masa kini, pentadbiran urusan dan hal ehwal harian Suruhanjaya serta pengawasan pelaksanaan dasar dijalankan oleh Pengerusi Eksekutif. Di bawah cadangan pindaan, pentadbiran urusan dan hal ehwal harian Suruhanjaya akan dijalankan oleh jawatan yang baharu diwujudkan iaitu Ketua Pegawai Eksekutif manakala pengawasan pelaksanaan dasar akan dijalankan oleh Pengerusi yang pada masa kini dikenali sebagai Pengerusi Eksekutif. Penyusunan semula yang dicadangkan juga mewujudkan dua jawatan baharu, iaitu Timbalan Ketua Pegawai Eksekutif dan Setiausaha.

2. *Fasal 1* mengandungi tajuk ringkas dan peruntukan mengenai permulaan kuat kuasa Akta yang dicadangkan.

3. *Fasal 2* bertujuan untuk meminda seksyen 2 Akta 665 untuk memasukkan takrif baharu ke dalam Akta 665.

4. *Fasal 4* bertujuan untuk meminda seksyen 11 Akta 665.

Subfasal 4(a) bertujuan untuk meminda subseksyen 11(1) Akta 665 untuk menjelaskan bahawa lembaga pengarah Suruhanjaya hendaklah bertanggungjawab bagi penjalanan urusan dan hal ehwal Suruhanjaya dan hendaklah menjalankan segala kuasa dan melakukan segala tindakan yang boleh dijalankan atau dilakukan oleh Suruhanjaya.

Subfasal 4(b) bertujuan untuk memotong subseksyen 11(2) Akta 665 kerana peruntukan mengenai ruang lingkup tanggungjawab lembaga pengarah Suruhanjaya telah pun diperkatakan secara jelas melalui cadangan pindaan subseksyen 11(1) Akta 665.

Subfasal 4(c) bertujuan untuk meminda subseksyen 11(3) Akta 665 untuk menggambarkan cadangan penyusunan semula lembaga pengarah Suruhanjaya.

Subfasal 4(d) dan *(f)* bertujuan untuk memotong subseksyen 11(4), (5), (6) dan (8) Akta 665 berbangkit daripada penyusunan semula lembaga pengarah Suruhanjaya.

Subfasal 4(e) bertujuan untuk meminda subseksyen 11(7) Akta 665 berbangkit daripada penyusunan semula lembaga pengarah Suruhanjaya.

5. *Fasal 5* bertujuan untuk memasukkan seksyen baharu 11A, 11B, 11C dan 11D ke dalam Akta 665.

Seksyen baharu 11A yang dicadangkan bertujuan untuk mengadakan peruntukan bagi pelantikan Ketua Pegawai Eksekutif dan Timbalan Ketua Pegawai Eksekutif.

Seksyen baharu 11B yang dicadangkan bertujuan untuk memperuntukkan kuasa dan tugas Ketua Pegawai Eksekutif.

Seksyen baharu 11C yang dicadangkan bertujuan untuk memberi Menteri kuasa untuk melantik secara sementara mana-mana Timbalan Ketua Pegawai Eksekutif untuk bertindak sebagai Ketua Pegawai Eksekutif sekiranya—

- (a) jawatan Ketua Pegawai Eksekutif kosong;
- (b) Ketua Pegawai Eksekutif tidak hadir bertugas atau tidak ada di Malaysia; atau
- (c) Ketua Pegawai Eksekutif, atas apa-apa sebab lain, tidak dapat melaksanakan fungsinya.

Seksyen baharu 11D bertujuan untuk mengadakan peruntukan bagi pelantikan setiausaha Suruhanjaya.

6. *Fasal 6* dan *7* bertujuan untuk meminda seksyen 13 dan 14 Akta 665 berbangkit daripada penyusunan semula lembaga pengarah Suruhanjaya.

7. *Fasal 8* bertujuan untuk meminda seksyen 15 Akta 665.

Subfasal 8(a) bertujuan untuk meminda subseksyen 15(1) Akta 665 untuk menjelaskan bahawa seseorang pegawai sesuatu koperasi tidak boleh dilantik atau kekal sebagai seorang pengarah lembaga pengarah Suruhanjaya bagi mengelak apa-apa percanggahan kepentingan.

Subfasal 8(b) bertujuan untuk meminda subseksyen 15(2) Akta 665 untuk memberi Menteri kuasa untuk membatalkan pelantikan mana-mana pengarah bagi lembaga pengarah Suruhanjaya tanpa perlu memberi apa-apa sebab. Pada masa kini, Menteri boleh menamatkan atau menggantung pelantikan mana-mana pengarah bagi lembaga pengarah Suruhanjaya menurut sebab yang dinyatakan dalam subseksyen itu.

8. *Fasal 9* bertujuan untuk meminda subseksyen 19(1), (3) dan (7) Akta 665 untuk memperuntukkan bahawa sekiranya Pengerusi tidak boleh memanggil, mengengerusikan atau mengawal selia perjalanan mesyuarat lembaga pengarah Suruhanjaya, Pengerusi boleh melantik mana-mana pengarah lembaga pengarah Suruhanjaya untuk bertindak bagi pihaknya.

9. *Fasal 16* bertujuan untuk mengadakan peruntukan bagi kecualian dan peralihan.

10. Pindaan lain yang tidak diperkatakan secara khusus dalam Huraian ini merupakan pindaan kecil atau berbangkit.

Rang Undang-Undang ini akan melibatkan Kerajaan dalam perbelanjaan wang tambahan yang amaunnya belum dapat ditentukan sekarang ini.

[PN(U2)3307]